

VENDIM
Nr.482, datë 29.06.2006

MBI REDUKTIMIN E KOHËS SË VLEFESHMËRISË SË LICENCËS SË TV “ABC”

Këshilli Kombëtar i Radios dhe Televizionit, i përbërë nga:

Halil	Lalaj	Kryetar
Sefedin	Çela	Anëtar
Albert	Minga	Anëtar
Visar	Zhiti	Anëtar
Agim	Duro	Anëtar

pasi mori në shqyrtim çështjen me:

OBJEKT: Për pavlefshmërinë e licencës së subjektit televiziv vendor privat “TV abc”.

SUBJEKT I INTERESUAR: TV “abc”, në mungesë.

BAZA LIGJORE: Ligji nr.8410, datë 30.9.1998 “Për radion dhe televizionin publik e privat në Republikën e Shqipërisë” neni 7, pika 21, neni 33, pika 5, si dhe vendimi nr.371, datë 10.11.2005 i Këshillit Kombëtar të Radios dhe Televizionit,

VËREN:

Me vendimin nr.210, datë 30.1.2004, KKRT ka licencuar për një afat 5-vjeçar z. Armand Baze për televizionin vendor privat TV abc me nr. licence 064/TVL, datë 6.2.2004.

Me vendimin nr.371, datë 10.11.2005 “Mbi vlefshmërinë e licencës së disa subjekteve rtv private”, pika 1/1, KKRT, pasi dëgjoi edhe pretendimet e paraqitura nga z. Armand Baze, ka bërë të pavlefshme licencën e subjektit televiziv vendor privat TV abc, për shkak se nuk ka shlyer pagesën vjetore të licencës për vitin 2004 në shumën 91.5 mijë lekë.

Pas njohjes me këtë vendim, i cili linte një afat prej 30 ditësh për paraqitjen e mendimit nga ana e subjektit, në datën 9.2.2006 pronari i TV abc ka dërguar një fax, sipas të cilit: “...frekuenca e akorduar për TV abc është e okupuar nga një stacion tjetër. TV abc vazhdon të jetë pa transmetim”.

KKRT konstaton se:

- argumenti i paraqitur nga subjekti nuk ka lidhje me shkakun për të cilin është marrë vendimi nr.371, datë 10.11.2006 i KKRT-së;

- subjekti TV “abc” nuk ka shlyer pagesën vjetore të licencës për vitin 2004 në shumën 91.5 mijë lekë;

- subjekti TV “abc” nuk ka shlyer pagesën vjetore të licencës për vitin 2005 në shumën 71.5 mijë lekë dhe taksën për përdorim frekuence në shumën 96 mijë lekë.

Në mbledhjen e datës 21.03.2006, KKRT, pasi dëgjoi pretendimet e përfaqësuesit të TV “abc”, i la si detyrë këtij të fundit të formtojë një kërkesë me shkrim ku:

a) të pohohet gatishmëria që brenda 6-mujorit të parë të vitit 2006 të shlyejë detyrimet financiare të vitit 2004 dhe brenda 6-mujorit të dytë detyrimet për vitet 2005-2006;

b) të deklarohet tërheqja nga zona që TV “abc” ka të miratuar me licencë me qëllim zvogëlimin e tarifave.

Nga ana e subjektit nuk ka pasur asnjë reagim apo pretendim për këto detyra të ngarkuara nga Këshilli.

KKRT vëren se në mbështetje të nenit 33 pika 5 të ligjit nr.8410, datë 30.09.1998, “Licenca bëhet e pavlefshme kur...5. kërkuesi ...nuk realizon detyrimet financiare të parashikuara me ligj ...”.

Gjithashtu, në mbështetje të nenit 7 të ligjit nr.8977, datë 12.12.2002 “Për sistemin e taksave në Republikën e Shqipërisë”, “Taksa vjetore është e menjëhershme dhe paguhet brenda 3 mujorit të parë të vitit në vazhdim”.

Ndërkohë, neni 34 pika 2 e ligjit, parashikon që “Këshilli Kombëtar i Radios dhe Televizionit ka të drejtë të heqë licencën e transmetimit kur:... nuk plotësohen kushtet për të cilat është dhënë

licenca...”. Në kushtet e licencës nr. 064/TVL që i është dhënë personit fizik z. Armand Baze, në pikën 12/b përcaktohet: “Pagesat që i licencuari i bën KKRT-së janë si vijon :...b) pagesa vjetore prej 71 500 lekësh për vitet e tjera të vlefshmërisë së licencës... për çdo tremujor, brenda datës 15 të muajit të dytë pasardhës”.

Siç rezulton, nga ana e subjektit televiziv « abc » nuk janë respektuar kërkesat e ligjit dhe kushtet e licencës. Koncretisht, nga ana e subjektit nuk është respektuar neni 33 pika 5 e ligjit nr. 8410, datë 30.9.1998 “Për radion dhe televizionin publik e privat në Republikën e Shqipërisë”, si dhe kushtet e licencës nr. 064/TVL, pika 12, paragrafi b.

Në mbështetje të nenit 56/a,b të Kodit të Procedurave Administrative, sipas të cilit “Palët e interesuara duhet të njoftohen për të gjitha aktet administrative nëpërmjet të cilave merren vendime në lidhje me pretendimet e tyre”, subjekti TV “abc” është njoftuar me shkresën nr. 541 prot., datë 27.6.2006.

PËR KËTO ARSYE,

Në mbështetje të ligjit nr.8410, datë 30.9.1998 “Për radion dhe televizionin publik e privat në Republikën e Shqipërisë” neni 7, pika 21, neni 33, pika 5, neni 137/3 pika b, si dhe vendimit nr.371, datë 10.11.2005, Këshilli Kombëtar i Radios dhe Televizionit

VENDOSI:

1. Të reduktojë kohën e vlefshmërisë së licencës nr.064/TVL dhënë personit fizik z. Armand Baze për TV “abc”, për një periudhë prej një vit.
2. Afati i përfundimit të licencës sipas pikës 1 të këtij vendimi është data 6.2.2008.
3. Kundër këtij vendimi mund të bëhet ankim brenda një muaji në gjykatë, në përputhje me Kodin e Procedurës Civile, kreu “Gjykimi i mosmarrëveshjeve administrative”.
4. Ky vendim hyn në fuqi menjëherë.

KRYETARI
Halil Lalaj